

Служба обща
преподобноисповеднице Российстей 20-го века единой

Вечер

На Господи, возвах: стихиры, глас 8.

Подобен: О, преславного чудесе:

О, преславного чудесе!// Евина дщ**И** избежа прелести змиевы,/ исповедница (*имярек*) преподобная,/ еяже лепота душевная/ Церкви Русския бысть украшение,/ та бо, страдания нивочтоже вменяючи,/ претерпе судище беззаконное./ Сего ради на Страшнем Суде Христовом/ милостивая заступница нам будет.

О, блаженнаго изволения!// Соманитида древле пророка Божия Елисея почти/ во дни отступления Израиля от Бога,/ ты же, преподобноисповеднице (*имярек*),/ во дни гонения безбожнаго в земли нашей,/ Христа небоязненно исповедала еси/ и, послежде благочестно поживши,/ подвиг твой в мире скончала еси./ Сего ради молим тя спастися душам нашим.

О, премудрости разума!// Восхваляет Соломон жену мужелюбивую,/ мы же вельми воспеваем боголюбивую,/ преподобную страдалицу (*имярек*),/ сия бо, научена от Святаго Духа,/ Христа на судищи исповедаше/ и, веру православную неложно хранящи,/ вратами правды в Царство Небесное вниде,/ идеже молится спастися душам нашим.

О, велия благочестия сило!// Павел хвалит благочестивую жену,/ наипаче ублажает девство Христа ради,/ ты же, преподобная мати (*имярек*),/ Небеснаго Жениха возлюбивши,/ вся красная мира оставила еси/ и, яко вено, страдание и житие праведное от Него прияла еси./ Ныне же с лики мудрых дев Христу предстоиши/ и молишися спастися душам нашим.

Слава, глас 3:

Божественным рачением укрепляема,/ пучину гонений добре прешла еси,/ преподобная (*имярек*) достославная,/ и к Свету Незаходимому, яко исповедница Христова, возшла еси,/ идеже вкупе с новомученики и исповедники Российскими молишися,/ о еже сохранитися земному Отечеству нашему в Православии/ и спастися душам нашим.

И ныне, Богородичен: Как не дивимся:

Вход. Прокимен дне.

И чтения 3 мученическая.

Пророчества Исаиина чтение (глава 43):

Так о глаголет Господь:/ вси языцы собрашася вкупе, и соберутся князи от них./ Кто возвестит сия в них?/ Или, яже от начала, кто слышана сотворит вам?/ Да приведут свидетели своя, и оправдятся,/ и да услышат, и да рекут истину./ Будите Ми свидетели,/ и Аз Свидетель, глаголет Господь Бог,/ и отрок, егоже избрах./ Да познаете и веруете Ми/ и разумеете, яко Аз есмь,/ прежде Мене не бысть ин Бог, и по Мне не будет./ Аз есмь Бог,/ и несть, разве Мене, спасай./ Аз возвестих и спасох,/ уничижих и не бе в вас чуждий./ Вы Мне свидетели, и Аз Господь Бог,/ и еще от начала Аз есмь,/ и

несть от рук Моих избавляй./ Сотворю, и кто отвратит то?/ Сице глаголет Господь Бог,/ избавляй вас Святыи Израилев.

Премудрости Соломоновы чтение (глава 3):

Праведных души в руце Божией, и не прикоснется их мука./ Непщевани быша во очесех безумных умрети,/ и вменися озлобление исход их./ И еже от нас шествие — сокрушение,/ они же суть в мире./ Ибо пред лицем человеческим, аще и муку примут,/ упование их безсмертия исполнено./ И в мале наказани бывше, великими благодетельствовани будут,/ яко Бог искуси я и обрете их достойны Себе./ Яко злато в горниле, искуси их/ и, яко всеплодие жертвенное, прият я./ И во время посещения их возсияют/ и, яко искры по стеблию, потекут./ Судят языком и обладают людьми,/ и воцарится Господь в них во веки./ Надеющиеся Нань разумеют истину/ и вернии в любви пребудут Ему,/ яко благодать и милость в преподобных Его/ и посещение во избранных Его.

Премудрости Соломоновы чтение (главы 5 и 6):

Праведницы во веки живут, и в Господе мзда их, и попечение их у Вышняго./ Сего ради примут Царствие благолепия, и венец доброты от руки Господни,/ зане десницею покрывает я, и мышцею защитит их./ Приимет всеоружие рвение свое, и вооружит тварь в месть врагом./ Облечется в броня правды, и возложит шлем, суд нелицемерен./ Приимет щит непобедимый, преподобие./ Поострит же напрасный гнев во оружие;/ споборет же с ним мир на безумныя./ Пойдут праволучныя стрелы молниины,/ и яко от благокругла лука облаков, на намерение полетят./ И от каменометныя ярости исполнь падут грады,/ вознегодует на них вода морская, реки же потопят я нагло./ Сопротив станет им Дух Силы, и яко вихор развеет их,/ и опустошит всю землю беззаконие, и злодейство превратит престолы сильных./ Слышите убо, царие, и разумеите, навыкните, судии концев земли./ Внушите, держащии множества, и гордящися о народах языков,/ яко дана есть от Господа держава вам, и сила от Вышняго.

На стиховне стихиры, глас 4.

Подобен: Дал еси знамение:

Дал еси крепость и силу/ боящейся Тебе, Господи,/ преподобноисповеднице (имярек),/ якоже древле святым женам,/ победити видимыя и невидимыя враги./ Темже ныне воспевают ю священницы Господни/ и величают вси людие земли Русския,/ яко претерпе гонения и заточения/ великия ради славы Твоея.

Стих: Приведутся Царю девы/ в веселии и радовании.

Аще безумнии тщася/ угрозами и лестию притворною/ течение твое ко спасению разорити,/ обаче преподобней руце к Богу воздевающи,/ амалика мысленнаго победила еси/ и, целомудрия свещу елеем исповедания уяснивши,/ с мудрыми девами в невестник неизреченныя славы возшла еси,/ стратотерпице (имярек) преподобная.

Стих: Исповемся Тебе в век, яко сотворил еси,/ и терплю имя Твое.

Яко ластовица доброгласная,/ Церкви нашей весну обновления/ страданием за Христа возвестила еси,/ богоблаженная мати (имярек)./ Ныне

же со гласом преподобных и всех новомучеников Российских/ Господа присно прославляеши/ и молишия Ему усердно,/ мир и благоденствие Отечеству нашему даровати/ и душам нашим велию милость.

Слава, глас 6:

Благодать Божию невредиму сохраняши/ страданием и исповеданием,/ в меру возраста исполнения Христова достигла еси,/ богомудрая мати *(имярек)*,/ и, яко пшеница добрая на ниве Российской взращенная,/ от жития претруднаго в Небесныя житницы собрана бысть./ Темже, Богу ныне предстоящи,/ моли о верою и любовью чтущих тя.

И ныне, Богородичен: Творец и Избавитель:

Тропарь, глас 5:

Христа Господа Иисуса верная ученице,/ Церкви Российской избранная агнице,/ преподобная мати *(имярек)*,/ легкое иго и язвы Господни любовью носящи,/ лестницею добродетелей и исповеданием веры/ к Нему, яко Небесному Жениху, востекла еси,/ Егоже моли сохранить в благочестии люди Российския/ и спасти души наша.

На утрени

По 1-м стихословии седален, глас 3:

Кто не подивится благоразумию твоему, досточудная мати *(имярек)*,/ яко Господу неотступно последовала еси и, о спасении души твоея Того усердно умоляющи,/ крепость на гонители Церкви Русския обрела еси./ Сего ради евангельски вопием ти:/ о, жено, вера твоя спасе тя.

Слава, и ныне, Богородичен:

Тя, ходатайствовавшую спасение рода нашего,/ воспеваем, Богородице Дево,/ плотию бо от Тебе восприятоу Сын Твой и Бог наш,/ Крестом восприим страсть,/ избави нас от тли, яко Человеколюбец.

По 2-м стихословии седален, глас 4:

В безмолвии и посте закону Господню поучающися,/ в нощи гонений на Церковь Русскую/ твердым исповеданием веры свеща негасимая явилася еси, преподобная мати *(имярек)*,/ и день грядущаго спасения Отечеству нашему возвестила еси./ Темже ты похвалами славными величаем.

Слава, и ныне, Богородичен:

Пресвятая Дево, упование христиан,/ Бога, Егоже родила еси паче ума и слова,/ непрестанно моли сохранить в Православии/ верою и любовью присно Тя величающыя.

Величание:

Величаем тя,/ преподобноисповеднице *(имярек)*,/ и чтим святую память твою,/ ты бо молиши за нас/ Христа Бога нашего.

Псалом избранный:

Терпя потерпех Господа, и внят ми и услыша молитву мою.

Постави на камени нозе мои и справи стопы моя.

Смирях постом душу мою.

Полунощи востах исповедатися Тебе, седмерицею днем хвалих Тя.

Неправду возненавидех и омерзих, закон же Твой возлюбих.

Утрудихся воздыханием моим, измыю на всяку ночь ложе мое, слезами моими постелю мою омочу.

Исповемся Тебе в правости сердца, внегда научити ми ся судьбам правды Твоя.

Избави мя от гонящих мя, яко укрепишася паче мене.

За словеса устен Твоих аз сохраних пути жестоки.

Искусил мя еси, и не обретеса во мне неправда.

Изведи из темницы душу мою, исповедатися Имени Твоему.

Бог мой еси Ты, и исповемся Тебе всем сердцем моим.

Благо есть исповедатися Господеви, и пети имени Твоему, Вышний.

Исповемся Тебе в век, яко сотворил еси, и терплю имя Твое, яко благо пред преподобными Твоими.

По полиелеи седален, глас 1:

Яко жена евангельская закваску в три меры муки вложи,/ тако ты, достохвальная, исповеданием веры Православныя/ тричастное души твоя осватила еси:/ разум – истиною Христовою,/ желаня – волею Божиею,/ чувства же – любовию ко Господу/ и сими, иже на Церковь Русскую ополчившыся,/ посрамила еси, преподобноисповеднице (*имярек*).

Слава, и ныне, Богородичен:

О, Державная Всецарице,/ преподобных Надеждо, мучеников Крепосте,/ Ангелов Славо, человек Покрове/ и всего мира Всемощная Заступнице,/ избави Церковь Русскую всякаго злаго обстояния,/ Едина Чистая и Благословенная.

Степенна, 1-й антифон 4-го гласа. Прокимен, глас 4: Дивен Бог во святых Своих,/ Бог Израилев. **Стих:** В церквах благословите Бога, Господа от источник Израилевых. **Всякое дыхание: Евангелие от Матфея, зачало 104.**

По 50-м псалме стихира, глас 6:

Днесь невеста Христова,/ страсготерпица (*имярек*) славная,/ кровьюми мученическими украшенная,/ яко голубица кроткая,/ криле поста и молитвы имущая,/ в чертог Небеснаго Жениха возлетевши,/ с лики святых новомучеников Российских/ Престолу Божию предстоит/ и славит Превечнаго Бога.

Канон, егоже краегранесие кроме Богородичнов: Приведутся Царю девы в след Ея. Глас 8.

Песнь 1

Ирмос: Поим Господеви,/ проведему люди Своя сквозе Чермное море,/ яко един славно прославися.

Приими пение, (*имярек*) благославная,/ цвете благоуханный Церкви Русския,/ от почитающих любовию постническая и исповедническая подвиги твоя.

Ревностию по Бозе/ стремления богохульная в Русстей земли посрамила еси/ и гонители безбожныя исповеданием веры обличила еси, славная (*имярек*).

Изушивши постом страстей море,/ твердою верою стезю исповедничества безбедно прешла еси/ и в Небесных селениях водворилася еси, *(имярек)* богоблаженная.

Богородичен: Тебе Предстательницу имущая, Пречистая,/ славныя жены, постом и терпением змиеву державу сокрушившая,/ славу Небесную обретоша.

Песнь 3

Ирмос: Ты еси Утверждение/ притекающих к Тебе, Господи,/ Ты еси Свет омраченных/ и поет Тя дух мой.

Веры Православныя щит восприемши,/ и одежду целомудрия облекшися, мати *(имярек)*,/ козни диавола, на тя устремленныя,/ мужественно отразила еси.

Евангельских заповедей исполнительница и Православия ревнительница,/ невеста чистая Христу Богу и украшение земли наша явилася еси,/ исповеднице *(имярек)*, доблестная мати.

Доблественне Богу работавши,/ плоть распяла еси со страстьми и похотьми/ и души твоя, мати *(имярек)*,/ любви ради Христовы не пощадила еси.

Богородичен: Тебе, Богородительнице, честныя жены предстоящая, славу воздают,/ пощением крепко подвизавшыся / и мужественне врага низложившыя.

Седален, глас 4:

Украсивши душу твою красотою кроткаго и молчаливаго духа,/ уста же исповеданием веры освятивши,/ Краснейшему добротою, паче сынов человеческих, предстала еси,/ за Русь многостадальную молящися,/ преподобноисповеднице *(имярек)* честная.

Слава, и ныне, Богородичен:

От Анны праведныя процветши, Дево,/ родила еси Царя Христа и радость роду человеческому даровала еси./ Сего ради рождеству Твоему срадуются благочестивых жен сословие земли наша,/ козни гонителей славно препобедившыя.

Песнь 4

Ирмос: Услышах, Господи,/ смотрения Твоего таинство,/ разумех дела Твоя/ и прославих Твое Божество.

Ум вперивши к Богу,/ амалика зломысленнаго молитвою победила еси, мати *(имярек)*,/ и, яко исповедница славная, страдания за Христа претерпела еси.

Твердость веры Православныя показавши, преподобная мати *(имярек)*,/ гонения, узы темничныя и горькия работы претерпела еси,/ силою Креста Христова укрепляема.

Страстей безобразия совлекшися, славная,/ подвиг чистоты и целомудрия явила еси/ и, ангельский образ восприимши,/ страданием Христу Богу сочеталася еси.

Богородичен: Богомати Пречистая,/ Господь от Тебе неизреченно плоть прият,/ сего ради жен естество, иногда под клятвою бывшее, ныне возвеличися.

Песнь 5

Ирмос: Утреннююще, вопием Ти:/ Господи, спаси ны,/ Ты бо еси Бог наш,/ разве Тебе иного не вемы.

Яко сокровище многоценное, спасения усердно взыскующи, преподобная мати,/ Христу усердно последовала еси/ и крест страдания мужественно подъяла еси.

Царства Небеснаго возжелевши, досточудная *(имярек)*,/ душу твою покаянием очистила еси/ и подвиги страдания терпеливно подъяла еси.

Ангели светоноснии дивящися терпению твоему, мати славная,/ душу твою, благодатию освященную,/ Престолу Господа Вышних Сил привелоша.

Богородичен: Покров и Заступницу Тя имущая, Всечистая,/ жены благочестивыя земли наша во дни безбожия не отвергошася Господа,/ обаче, изгнания и страдания мужественно претерпевающыя,/ непобеждены пребыша.

Песнь 6

Ирмос: Ризу мне подаждь светлу,/ одеяйся светом, яко ризою,/ Многомилостиве, Христе Боже наш.

Ризу плотскаго мудрования совлеки воздержанием и мучением, боголюбезная *(имярек)*,/ ризу спасения от Христа Бога невестоплепно восприяла еси,/ темже во тьме безбожия досточудно в стране нашей просияла еси.

Юзы темничныя, глад и гонения/ претерпела еси мужественно, преподобноисповеднице *(имярек)*,/ темже образ веры и благочестия Российским женам явила еси.

День и ночь простирала еси, исповеднице, преподобней руце твои к Богу,/ Единому могущему сохранить тя в напастех,/ темже тя ублажаем.

Богородичен: Жены и девы, благочестию поношаему в стране нашей, постом и страданием Господу угодиша./ Ныне же непрестанно молятся Сыну Твоему, Пречистая,/ да утвердится в Православии Церковь Русская.

Кондак, глас 4:

Яко крин благоуханный,/ посреде пустыни безбожия/ в земнем отечестве твоем процвела еси,/ преподобная мати *(имярек)*,/ и, подвиги воздержания исповеданием веры украсивши,/ востекла еси к Небесному Жениху Христу,/ Иже увенча тя красотой славы нетленныя.

Икос:

Како воспоем тя, Церкви Русския похвалу, достоблаженная исповеднице преподобная *(имярек)*,/ от юности житейская попечения отринувшую/ и благую часть и единое на потребу избравшую,/ преподобие подвигом законным запечатлевшую/ и страданием слово Христа Бога нашего исполншую,/ Иже увенча тя красотой славы нетленныя.

Песнь 7

Ирмос: Отроцы еврейстии в пещи/ попраша пламень дерзновенно/ и на росу огонь преложиша, вопиюще:/ благословен еси, Господи Боже, во веки.

Елеем благодати огонь любви ко Христу распалаючи,/ огня вечного избегла еси/ и, гонения мучителей нивчтоже вменяючи,/ в Чертог к Жениху Небесному возшла еси,/ преподобноисповеднице (*имярек*) славная.

Вавилони дщере окаянная мерзкое порождение,/ безбожию хотящее предати землю Русскую,/ о камень исповедания твоего псаломски разбила еси, преподобная мати (*имярек*).

Воздержания росой пламень страстей угасивши,/ исповеданием веры востания богохульная сокрушила еси, достоблаженная мати,/ и образ верным людям явила еси.

Богородичен: Яко Бога рождшую плотию, Пречистая,/ нравом благочестным чтим Тя непрестанно/ вкупе с честными женами,/ постом просиявшими и страданьми врага низложившими.

Песнь 8

Ирмос: Седмерицею пещь/ халдейский мучитель/ богочестивым неистовно разжже,/ силою же лучшею спасены сия видеи,/ Творцу и Избавителю вопияше:/ отроцы, благословите,/ священницы, воспойте,/ людие, превозносите во вся веки.

Спасется жена чадородием, вещает апостол,/ ты же, преподобноисповеднице (*имярек*), многия добродетели породивши,/ яко лоза плодovitа, в вертограде Церкви Русския явилася еси/ и страданьми твоими вино спасительное источила еси/ славящим о тебе Христа во веки.

Любовию Христовую уязвившися,/ к исповеданию веры устремилася еси, (*имярек*),/ и, чистоту душевную хранящи,/ страдание, яко дар, Невестокрасителю душ принесла еси,/ превозносящи Его во веки.

Евино преслушание, породившее смерть, присно помышляючи, достославная (*имярек*),/ послушанием Христу миру умре,/ последи же и исповеданием веры прослави Его./ Темже, на Небо возшедши,/ Троицу Святую благословиши во веки.

Богородичен: С новомученики и исповедники Российскими, Пречистая,/ и всеми святыми женами/ умоли Единаго во святых почивающаго/ сохранить землю нашу, славословящую Тя во вся веки.

Песнь 9

Ирмос: Ужасеся о сем Небо/ и земли удивишася концы,/ яко Бог явися человеком плотски/ и чрево Твое бысть пространнейшее Небес./ Тем Тя, Богородицу,/ ангелов и человек чиновачалия величают.

Дары Христу любовию принесла еси, преподобноисповеднице (*имярек*),/ молитву – яко злато, пощение – яко ливан и страдание – яко смирену./ Тем тя благочестно величаем.

Елеем целомудрия и исповеданием веры преукрашена,/ вся добра явилася еси/ и Единому Жениху обручилася еси./ Егоже моли спастися почитающим память твою, (*имярек*) славная.

Яко горлица пустыннолюбная, превитаючи в Горний Сион,/ от сети ловящих избавилася еси Православною верою, страдалице честная,/ видимых и невидимых враг посрамивши./ Темже тя купно с ангельскими лики почитаем.

Богородичен: Тебе, Всепетую Владычицу,/ яко Всецарицу, Христу Царю предстоящую,/ вкупе с преподобноисповедницею (*имярек*) достойно величаем.

Светилен:

Духом просвещаема, (*имярек*) преподобная,/ исповеданием Христа возсияла еси в Церкви Русстей./ Сего ради светом Небесным чтущия тя озари, мати всехвальная.

Слава, и ныне, Богородичен:

Воистинну, Богородице, Тя благодарственне величаем,/ Ты бо еси Мати рода христианскаго и Хранительница достояния Твоего, Церкви Российския,/ и возглавие лика святых жен.

На хвалитех стихиры, глас 8.

Подобен: О, преславнаго чудесе:

О, исповеднице (*имярек*) преподобная,/ ты все житие твое ввергла еси/ в сокровищницу Церкви Русския,/ яко вдовица две лепте,/ воздержанием и страданием,/ молитвою и чистотою,/ помышляючи, яко лучши праведнику малая,/ паче богатства многа грешному,/ и ныне, яко мудрая дева, восхваляеши Господа.

О, преславнаго чудесе!/ Кровоточивая жена верою иногда исцелися,/ ты же, честная, (*имярек*),/ узы темничныя и страдания восприемши,/ твердым исповеданием веры Христовы/ гонителей посрамила еси/ и, яко жена, любящая Господа,/ достойно и праведно пожила еси,/ темже тя прославляем.

Тя, умершую миру изволением/ и душу за Христа не пощадевшую,/ воздвиже Человеколюбец Господь,/ яко дочь Иаинову,/ к Небесней жизни и безсмертней трапезе,/ славная преподобноисповеднице (*имярек*)./ Темже в Церкви Русстей,/ яко дочери Сиони во вратах Иерусалима,/ о тебе хвалы Богу возсылаем.

Слава, глас 4:

Слезы постническия и страдания/ многою верою и любовью Христу принесла еси,/ преподобноисповеднице всечестная,/ и ныне дерзновение имаши/ молити о прощении грехов наших,/ просящи Православней Церкви утверждения,/ отечеству нашему благостояния/ и всем людем велия милости.

И ныне, Богородичен, глас тойже:

Призри на моления Твоих раб, Всенепорочная,/ всякия скорби избавляючи землю Русскую,/ дом Твой нареченную/ и кровью новомученик и исповедник освященную./ Да не постыдимся, Владычице Державная, Тя призывающи,/ всех православных помощи,/ радости и покрове / и спасение душ наших.

Славословие великое и отпуст.

На Литургии

Блаженна от канона, песни 3-я и 6-я. Прокимен, глас 4: Боже, дочери царей в чести Твоей. Стих: Приведутся Царю девы в след Ея. Апостол: 1 послание Петрово 1, зачало 58 от полу (глава 2, 18-3,9). Аллилуиа, глас 1: Искренния Ея приведутся Тебе. Стих: Приведутся в веселии и радовании, введутся в храм Царев. Евангелие от Луки, зачало 33. Причастен: В память вечную:

Молитва

О, всехвальная преподобноисповеднице (*имярек*), кроткая Христова агнице, земли Российския цвете благоуханный, избранная, непорочная и добрая в женах!

Ты, благое иго заповедей Господних терпеливо подъемши и язвы Его преподобием носящи, любовь последовала еси Христу. Во дни же гонений на Церковь Русскую мужественно во исповедании Православныя веры пребыла еси и, житие монашеское подвигом страдания увенчавши, в чертог Небеснаго Жениха возшла еси.

Темже молим тя, славная в женах исповеднице: моли Церкви нашей в мире и благоденствии пребывати, стране же Российской непоколебимей в Православии и мире сохранитися и всех врагов сокрушити. Верным, подвиг иночества воприимшым, во благочестии и послушании укрепитися, в ревности по Бозе не оскудевати и неропотным, бодренным и благодарным всегда быти. Нам же, любовью тя почитающим, испроси время на покаяние, твердость во исповедании веры истинныя, заступление от козней вражиих и на Страшнем Суде предстояние одесную Господа нашего Иисуса Христа. Ему же со Отцем и Святым Духом подобает всякая слава, честь и поклонение ныне и присно и во веки веков. Аминь.